

四庫全書

集部

欽定四庫全書

武夷新集卷十六

宋 楊億 撰

表狀五 二十首

進奉承天節禮物表

進奉賀承天節絹一千疋右伏以六龍出震適逢華渚
之祥萬國奉琛競奏塗山之會祝後天而斯切陳任土
以攸同前件絹絞杼非工繭絲乏麗什一之取蓋出於
地征旅百之餘願充於庭實表封人之善頌同野老之

薦誠干犯宸嚴伏增隕越謹差教練使陳昭簡押領上進

論郊裡加勲制書錯誤狀

右臣近者蒙恩加勲已奉表稱謝訖臣伏讀制命竊佩訓詞以臣有奉冊從祀之勞於以用舍爵策勲之典退自循省罔敢遑寧蓋以臣出領使符遠違文陛職當奉引既阻屬車之塵位列常叅莫厠大夫之後籍雖連於近署禮不覩於嚴裡猥窺明詔之文實越下臣之分然

以恩覃具位慶洽普天或叅表著之餘曾微內外之隔
如臣者既官常之未改荷寵澤以無辭至敦獎之所云
實競凌而非據蓋慮司言之任罔遵書命之方或恐詔
旨稽留苟圖簡易或因除目填委不暇甄明致渙汗之
已行類朱紫之無別竊以四禁之設妄誤為尤八柄所
施僭濫非可故王者之出令示人不欺有司之守官失
職乃死雖小事而必慎恐大體之或虧治本是資政典
攸繫臣嘗披載籍幸寘周行括囊不言懼罹出位之罰

扣閤有請實懷犯上之憂然乃朝廷之紀綱固非下臣之擬議輒茲披露誠屬僭踰伏乞聖慈覆驗臣所受告身制詞即知臣所陳非謬臣無任云云

大駕還京進奉狀

進奉賀大駕還京絹五百疋右伏以六羸宵遯萬乘天旋數軍實於明庭獻夷俘於清廟乾坤開泰朝野歡娛鳥獸率舞於兩階玉帛駿奔於萬國臣任當求瘼慶屬回鑒歡呼不及於周行職貢合歸於長府前件絹冰紈

非妙繭稅所輸幸因振愷之辰輒効充庭之獻菲薄之至隕越無從臣無任兢惶激切之極謹差子城使朱繼隆押領上進

奏舉李翔狀

右臣忝分朝寄獲領郡符總官屬以頗多在吏能而畢見合伸論薦敢避僭踰臣竊見前知本州青田縣事李翔元是御前試中進士植性耿介臨事強明不染脂膏自甘藜藿當州龍泉縣山深地險俗薄民頑歲有逋租

獄多滯訟號為難治非止一朝翔權知一考有餘庶事
辦集刑清訟息吏不敢欺又權本州判官推官兩廳公
事僅及半年甚彰才幹勤恪匪懈潔白無私求之輩流
不可多得伏望聖慈擢授京官別加任使儻犯贓罪臣
甘當連坐之文

代樞密陳諫議乞停妻封邑狀

右臣伏蒙聖慈特進封臣妻寧陵縣君宋氏京兆郡夫
人者不材之質方玷於樞衡非次之恩更需於閨壺省

循之際啟處靡遑然臣竊有懇誠須至披露冀九重之
垂聽實萬死之難逃伏念臣堂有慈親年當暮齒擇鄰
斷織徒承訓勛之恩扇枕調甘莫効劬勞之報幸遇升
平之運獲叅宥密之班况復私門最為殊事庭闈之上
俱臨鶴髮之年晨夕之間更遂萊衣之樂如臣榮幸曩
絕比倫矧又臣父擢自曹郎便升卿寺臣母召於宮掖
得對天顏軒墀之上既頒命婦之服伉儷之際又疏大
郡之封恩渥便蕃榮懼交積然而絲綸之寵雖荷於涵

欽定四庫全書

武英新集
卷十六

四

濡芒刺之懷未安於反仄蓋以臣妻忽膺於異數臣母有礙於常文妻忝夫人之稱母仍縣君之號事舅姑於私室情所不遑奉朝謁於公宮禮或非便於臣之分豈敢自安在經制以詢求固有司之宜執蓋以五代俯及皇朝凡預近司少逢具慶遂致敘封之典別無畫一之規婦姑之分既踰臣子之心彌懼伏望尊號皇帝陛下曲迴玄造俯察丹誠寢茲加等之封俾遂承顏之懇豈惟微臣事親盡禮在孝道以獲伸實亦聖朝垂世作程

著典章而茲始

考制策畢學士院賜宴謝狀

右伏蒙聖慈以臣等考制策畢特降中使就學士院賜
酒食管領者臨軒策試方舉於舊章前席咨詢屢承於
睿顧信宿纔終於考校雲天忽被於沾濡特就禁林俾
開盛宴輟大庖而供擬為近署之光華挹中衢之樽徒
知充量享大官之膳彌媿素餐仰荷天慈臣等無任云
云

中書謝社日賜御筵狀

伏以歲及有秋節當命社潔粢盛而報本式舉禮經錫宴樂以推恩載符易象荷便蕃之睿渥實光寵於近司此蓋皇帝陛下道契授時仁彰逮下倉箱流詠克逢棲畝之祥穀核具陳遽有加籩之賜俾為高會以樂佳辰傳舊俗於南京霑鴻私於北闕挹堯樽而知幸倒載寧辭調伊鼎以無功素食是懼

閣下進和聖製社日詩狀

右臣等近蒙聖慈賜臣等御製杜日七言四韻詩一首
令依韻和者九秋方半爰逢命社之辰三象式瞻遽捧
橫汾之作思極天人之際調均律呂之和仰之彌高固
莫窺於玄遠和者益寡徒強扣於虛無臣等俱以短才
謬塵禁掖紫泥封詔曾無潤色之能栢殿裁詩幸預唱
酬之末雖共呈於濫吹實有蹟於皇明其次韻詩謹隨
狀上進干冒宸嚴云云

代門下李相公承天節設齋奏狀

右臣伏以候管飛灰適遇一陽之節祥虹流渚爰逢載
誕之辰凡居率土之濱同祝後天之算況臣本惟庸瑣
獲遇承平荷天地之深仁竊公台之顯位但負妨賢之
媿曾微補職之勞受恩最深報德無所幸屬統樞之慶
彌堅傾藹之心奉陶唐之文思誠慙將順獻華封之富
壽徒切勤拳竊惟震旦之區素重正乾之典能植有為
之福用成無上之緣臣是敢專就精藍式修淨供命苾
芻之開士誦貝葉之真文作鍾梵於六時設香燈之四

事遵金仙之教克崇衆善之因當里社之祥庶祝無疆之壽雖盡傾虔之懇庶酬覆露之私

議靈州事宜狀

右臣今月十六日中使至奉御劄子朕常覽古書備詳邊事得其人則舉無遺策失其事則謀之不臧朕三復斯文終朝在念未嘗不察言觀行捨短從長希戮力於邦家冀太康於宇縣其如妖氛不息邊塞未寧北狄雖具於隄防西鄙尚多於艱阻靈武是中原巨屏平夏乃

近域小蕃久興蛇豕之心常作疆場之患阻絕道路侵犯軍城狂妖轉恣於無厭大郡翻成於孤壘縱之則終成暴亂討之則慮困生靈兩途宜在於咨詢百中須從於籌略卿職當綸綍位列清華披經史之遺文大資智畧觀古今之盛事必蘊機謀黥虜用何策以翦除靈州以何方而廢置棄之則有何利害存之則有何便宜專聽必當之謀無恡酌中之論分明擘畫密具奏聞用符果決之誠以副蕩滌之望者竊以詢於芻蕘前王之盛

德謀及卿士載籍之格言蓋所以竭盡下情詳求中道使舉無失策動必有成斯聖皇慎重之至也然而狂夫之言聖人擇焉謀之欲多斷之在獨伏惟皇帝陛下清閒之宴親紆睿覽言可用者行之不疑臣某幸甚幸甚臣嘗讀舊史漢武北築朔方之郡平津侯諫以為罷敞中國以奉無用之地願罷之上使辯士朱買臣等發十策以難平津平津不能對臣以為平津侯為漢賢相深明經術習知利害屬武帝以雄侈自任志在開拓買臣

等以詞辯獲進並侍左右前史又稱平津每朝會議論
但開陳其端使人主自擇不肯面折廷諍由此言之非
不能折買臣之舌蓋所以將順人君之意耳即朔方之
非便有自來矣且其地非禹貢九州之內非周官職方
所領在要荒之外固聲教不及元朔中大將軍衛青攘
却匈奴取其河南地以列置郡縣今靈州是赫連果地
後魏置州蓋朔方之故墟即匈奴之舊壤僻介西鄙懸
絕諸華數百里之間無有水草烽火不相應亭障不相

望當邊境謐寧羌戎即叙道路不壅餽饋無虞猶足以
張大國之威聲為中原之扞蔽自契丹作梗邊邑屢驚
雜虜為其脅從兇黨因而昌熾待之以爵賞頗驕蹇而
不恭討之以甲兵又遁逃而無獲凡有贏糧之役必興
狙擊之謀每至靈武轉輸大須發卒防援離去內地皆
無關心經涉畏途多有菜色自曹光實白守榮馬紹忠
及王榮之敗資糧靡屨所失至多將士丁夫相枕而死
以至募商人入穀輸帛償以數倍之價復於積石之孤

壤別築清遠之一城邊民繹騷國帑匱乏既不能制點
虜之死命又不能救靈武之急難數年之間兇黨逾盛
靈武危堞歸然僅存河外五城繼聞陷沒但堅壁清野
坐食糗糧閉壘枕戈苟度朝夕且使賊遷橫行沙漠俶
擾壇陞擊列鎮之戍兵侵屬國之蕃部雖有警息無候
望而得知縱或憑凌但繕完而自保未嘗出一兵馳一
騎敢與虜掬此靈武之存無益明矣平津所言罷散中
國以奉無用之地正為今日也臣以為存之有大害棄

之有大利且如國家募人入粟儻以十倍之直發卒轉
餉涉茲不毛之地此古人所謂率二十鍾而致一石毆
民於死地者也今或棄之即可以歲省戍卒分守內郡
一卒之費可給十夫國家無飛芻輓粟之勞士卒免暴
露流離之苦必謂廢之即虧失土地傷損威重且如堯
舜夏禹聖之盛者也地不過數千里而明德格天四門
穆穆武丁成王商周之明主也然地東不過江黃西不
過氐羌南不過蠻荆北不過太原而頌聲並作號為至

治及秦漢拓土窮兵遠略雖疆理益廣而干戈日尋府庫之資財屢空生靈之肝腦塗地校功比德豈可同年而語哉夫蝮蛇螫手壯士斷腕蟻壤不塞將漏山河今靈武之存為害甚於蝮蛇供饋之費為蠹逾於蟻壤無鴻毛之益有泰山之損豈可忽遠大之畧徇悠悠之談昔西漢賈捐之嘗建議棄朱崖當時公卿亦有異論元帝能排衆多之說奮獨見之明下詔廢之人頌其德元帝之意寧欲自棄其地當其內屬為郡固已置吏而拊

循及其稱兵構亂豈可勞民而征戍故其詔書曰議者以棄朱崖羞威不行夫通於時變即憂萬民萬民之飢餓危孰大焉且宗廟之祭凶年不備況乎避不嫌之辱哉臣以為正與今日靈武之事相類當羌夷寧謐靡有寇孽可以存而勿論及勞師費財無益保鄯固宜廢而不舉何足以傷威重而貽羞辱哉必以失地為言即燕薊八州河湟五郡所失多矣何必此為議者又以西北諸蕃戎馬是產資其控制以通貿易環慶諸州內附蕃

落藉其屏翰以免驚騷此又迂濶之甚且戎人為利所誘故牙市於邊闕蕃部之族自強故能庇於種類必來寇以環慶固無隔於藩籬百雉危城千里懸隔自救不暇豈及於他議者又以其土地田沃饒有漢陂之利恐賊遷因而播種益以富强況戎人但以攻剽為能罔知耕稼之事河隴之外棄地甚多延袤百城提封萬井西漢屯田之所疆畔猶存儻事力耕可以積穀何必獨耕靈武乃能足食若靈武於賊有大利即是必爭之地當

朝夕攻取豈至於今皆為孟浪之談殊非經久之計況又歲有調發動致寇數借寇兵而齎盜糧竭民力而耗國用為患之大無出於斯雖庸人豎子亦知其可棄也然自清遠淪陷斥候不通孤城之人如釜中之魚躍黥虜之勢若崑山之火炎朝廷必欲棄之須牙璋徵兵靈旗直指約齎深入執父前驅鼓行賊中傳於城下然後合其將卒遷其人民隳城復隍塞井夷竈乃為棄也臣伏料國家物力尚屈未暇此行雖曰棄之亦空言耳今

一城生齒正在焚溺之中咸必死以是憂思自脫而無路若陛下慎選單介間道而行齎持詔書宣布王命令其盡焚廬舍自拔而歸丁壯悉令持兵老幼以之樞負古稱歸師不可遏又曰置之死地而後生之當此之時人百其勇臨難思免其鋒莫當國家又須申命偏師揚言出塞軍聲既振賊勢自分即靈州東遷之民不虞邀擊之患雖有剽刦易為枝梧且國家所惜者士民所急者財用豈可以驍果之旅委於飢虎之蹊府藏之實填

於廬山之堅今若棄去靈武退守環慶卒免戍於絕域
民思保其室家供饋不出於郊圻恩德自淪於骨髓民
力不竭士氣益揚何敵不摧何戎不克恭惟陛下欲康
宇縣慮困生靈求必當之謀思酌中之論臣以靈州之
廢置計無出於此望陛下採之而已陛下又憤茲黠虜
思欲翦除臣以為不可黠武以窮兵止可伐謀而制勝
臣竊料賊遷睢盱邊塞之外倔強沙漠之中脅制諸羌
嘯聚不逞無耕農之業無蠶織之工為鼠竊之謀以資

衣食聚烏合之衆以擾塞垣致蕃夷之服從用亢威而
驅迫非有厚利能誘其人朝廷今廢棄靈州每歲更無
饋運絕其覬望何所窺圖此困賊遷之一也平夏之西
池鹽斯在先是貿易粟麥用資餼糧今條禁甚嚴法網
尤密無敢踰越漸致攜離此困賊遷之二也嚴勅疆吏
謹奉國經辦其非常禁其闌出使竹頭木屑不遂其求
狗盜雞鳴無施其巧游魂空磧坐抵困窮此困賊遷之
三也然須精選銳師分守邊地慎擇名將授之廟謀訓

練驍雄隄防侵軼險其走集明其偵候苟鷁張而承突
必烽舉以燧燔併力翦除分路驅逐如秦人之鹿犄角
以攻譬常山之蛇首尾相應叢爾兇醜坐致滅亡臣竊
見太祖朝命姚內斌領慶州董遵誨領環州二人所統
之兵纔五六千而已閭外之事一以付之軍市之租不
從中覆用能亡卒効命羌夷畏威朝廷無旰食之憂疆
場無羽書之警臣欲望陛下於武臣中選有將帥之才
知邊鄙之事者三數人分布諸郡各量其所將兵多少

付之除廩祿之外賜與一大縣租賦恣其犒設令開幕
府辟召髦俊為之僚佐咨以策略勇力之士稟其指蹤
之用軍旅之政許以便宜而行儻賊遷侵邊郡軍城擾
內屬蕃部並脣齒相援腹背夾攻或戰馬正肥戎士思
奮即徵發內屬討虜生羌俘獲之餘盡分麾下且戎人
利於降附蓋迫兇渠儻撓之以勁兵示之以大信懷荒
振遠推亡固存出金帛以購酋豪懸爵秩以寵降附明
立賞格厚答戰功即賊遷之腹心稍稍奔潰親離衆叛

事去運乖瑩瑩獨夫誰與為伍但塞外一胡人耳安能
與大邦為讎哉陛下若欲謀成廟堂功在漏刻臣以為
此虜方黥其財猶豐腥臙之羣如臂使指未可以歲月
破也直須廢棄靈州退保環慶然後以計困之耳如臣
之策極得三兩驍將付以一二萬精卒以數縣租賦給
其用度令分守邊郡賊遷可以計日成擒朝廷可以高
枕無事矣臣從事儒學豈知軍旅耳剝日久心知其然
輒罄謏聞仰祗清問談不稽古詞非據經進思盡忠蓋

事君之無隱謀或可用豈以人而廢言干冒宸嚴臣無任云云

代門下李相公謝冬至日就第賜宴狀

右臣今月三十日中使至奉宣進旨就臣私第賜御筵者太史書雲方及履長之慶大庖推食俄承錫宴之恩仰允澤之所霑顧衡門之有耀此蓋皇帝陛下德綏率土道契先天南畝秋成俯遂有年之望北胡宵遁將臻下武之期屬四鄙之無虞且一陽之始兆黃鍾中律方

臨亞歲之辰玉笋推恩爰霑自天之澤類當衢之堯酒
同小會於漢儀蝸牛之廬頓增於氣燄鼯鼠之腹徒極
於滿盈

代僕射呂相公寒食日謝賜御筵狀

右臣今月某日中使至奉宣聖旨就臣私第賜御筵者
俯及中春爰逢嘉節司烜禁火聿舉於舊章太原移書
式傳於遺俗以令文而休澣方私室以宴安敢期明主
之推恩特許近臣而樂飲錫衢樽之九醞分玉食之八

珍聳榮觀於里閭
浹歡心於簪組
羽觴無算徒極於醺
酣
天威不遠彌增於殞越
內省庸虛之質曷酬慈惠之
仁

又謝賜詩狀

右臣等今日中使至伏蒙聖慈賜臣等寒食詩者堯厨
輟膳方推式宴之恩周雅陳詩忽覩變風之作見橫汾
之絕唱契在藻之歡心伏惟皇帝陛下感品物之載陽
乘穆清之多暇爰紆睿思是發永歌扣寂寞以求音均

和六律麗昭回而垂象賁彩三辰皆四始之微言俾萬物而咸覩臣等幸塵台席獲捧宸章莫能側管以窺天徒覺聞韶而忘味仰荷君親之賜曷酬覆載之仁

考試貢舉人畢謝賜宴狀

右臣等伏蒙聖慈以臣等考試貢舉人畢就學士院賜酒食者諸侯貢士式副於旁求萬乘臨軒載加於慎選幸備掄材之數魏無刈楚之能瞻咫尺之天顏徒增殞越仰躬親於日昃莫奉疇咨漢庭已覩於決科周室允

稱於多士但慶文明之盛誠慙品藻之工敢期特就深
嚴俯頒宴勞分蓬蒿之盛饌美極八珍霑玉笋之醇醪
醉期千日唯負屬厭之媿曷酬慈惠之仁

代宰相謝賜新印三國志狀

右臣等伏蒙聖慈賜臣等印本三國志各一部者鼎國
三分備存於事跡麟臺四部具列於籤題初成鏤版之
功遽荷賜書之寵此蓋皇帝陛下先天合德乙夜留神
小大必示於躬親今古咸歸於指掌以為方策所紀皆

可以勸懲魚魯相傳漸多於譌謬俾盡校讎之妙載加
刊刻之工雕鏤纔畢於有司頒賚首沾於近列仰認好
文之旨俯循惜學之姿竊位公台已共慙於尸祿服膺
載籍庶或免於面牆曲承覆幬之仁永佩君親之賜臣
等無任云云

代諸同官陳乞狀

右臣等謬塵禁掖獲掌命書莫有補於休明但共慙於
尸素所宜循默豈合祈求顧臣子無隱之誠仰穹昊蓋

高之聽退循僭易靡敢違寧伏念臣等本自諸生濫干
寸祿偶策名於昭代尋竊吹於清途束帶垂紳獲廁大
夫之後簪筆持橐預修太史之書蓬丘一忝於職名莫
厯屢更於歲序入芝蘭之室頗襲芬馨掌綸綍之言誤
膺採擢自草紫泥之詔遂違羣玉之峰官局既殊風流
莫接英髦咸集不獲田蘇而與遊綳素實繁皆是黃香
之未見深慕多聞之益敢忘強學之心伏望皇帝陛下
察以懇誠寬其罪戾念臣等兩朝大典獲奉成書五人

同僚獨無兼職許於館殿俾預刊修庶遊翰墨之林更
勵鉛黃之業披文金匱諒或至於絕編加俸水衡實有
資於懸磬干犯旒宸伏俟允俞

次對奏狀

右臣位列朝行次當轉對輒傾鄙見上瀆宸聰退省狂
愚伏增恐懼臣竊以朝廷之所貴者唯班爵是先君人
之所重者唯名器為急是以籩豆之事各有司存樽俎
之間不相踰越思不出位君子稱其守官必也正名先

王以之經國恭惟國家克遵舊制並建羣司公卿大夫表著咸設臺省監寺曹局畢陳然而徒有其名不舉其職只如尚書會府上法文昌治本是資政典攸出條目皆具可舉而行今之存者但吏部銓擬秋曹詳覆自餘租庸筦推由別使以總領尺籍伍符非本司而校定職守雖在或事有所分綱領雖存或政非自出丞轄之名空設而無違可糾端揆之任雖重而無務可親周之六官於是廢矣且如寺監素有於掌執臺閣咸著於規程

昭然軌儀布在方策昔者漢行故事宣帝以之中興魯
為長府閔子譏其改作臣以為國家慮命擬之未允故
置審官之司憂議讞之或濫故設審刑之署恐命令之
或失故建封駁之局臣以為在於紀綱之不舉不在於琴
瑟之更張若辯論官材歸於相府即審官之司可廢矣
詳評刑辟屬於司寇即審刑之署可去矣出納詔命
關於給事中即封駁之局可罷矣至於尚書二十四司
各揚其職寺監臺閣悉復其舊按六典之制度振百司

之遺墜在我而已夫豈為難如此則朝廷益尊堂陛益峻典故益舉品流益清端拱而天下治者由茲道也臣又以唐虞之時建官惟百夏商官倍秦漢益繁施及有唐典策咸在自三公之極貴九品之至微著於令文皆有員數傳云官不必備唯其人蓋闕之斯可矣若乃員外加置任非其才故竈下羊頭形於嘲諑斗量車載播厥風謠國體所先尤須慎重臣竊覩班簿員外郎及二百餘人郎中亦及百數自餘太常國子博士殿中丞中

舍洗馬俱不下數百人率預常叅皆著引籍不知職業之所守多由恩澤之序遷臣竊以昔館陶公主為子求郎以為上應列宿以至更直建禮伏奏明光含香握蘭雍容侍從又嘗讀唐朝故事益知省郎之貴三院御史歲滿願遷者多拗項以望省署因而名橋或次補綸闈或便除給諫出刺大郡猶謂左遷今乃百十為羣殆非為官擇人之旨臣欲乞按唐制應九品已上官並定員數臣又念昔者秦之開郡置守漢以天下為十三部命

刺史以領之自後因郡為州以太守為刺史降及唐氏亦嘗變更曾未數年又仍舊貫今國家多命省署之職出為知州又設通判之官以為副貳此權宜之制耳豈可為經久之訓哉臣欲乞諸州並置刺史以戶口多少制其俸祿分下中上緊望雄之等級品秩之際率如舊章與常叅官比視階資出入更踐省去通判之目但置從事之員建廉察之府以統臨按輿地之圖而區處昔者興國初詔廢支郡出於一時十國為連周法斯在一

道置使唐制可尋至若號令之行風教之出先及於府
府以及州州以及縣縣以及鄉里自上而下由近及遠
譬如身之使臂臂之使指提綱而衆目張振領而羣毛
理由是言之支郡之不可廢也明矣臣欲乞復置支郡
隸於大府量地里而分割如漕運之統臨名分有倫官
業自舉臣又覩唐制内外官俸錢之外有祿米職田又
給防閑庶僕親事帳内執衣白直門夫各以官品差定
其數歲收其課以資於家本司又有公廨田食本錢以

給公用自唐末離亂國用不充百官俸錢並減其半自餘別給一切權停今羣官於半俸之中已是除陌又於半俸三分之內其二分以他物給之鬻於市鄣十纔得其一二曾糊口之不及豈代耕之足云昔西漢張敞蕭望之上言以為倉廩實而知禮節衣食足而知榮辱念吏俸不足者常有憂父母妻子之心雖欲為廉其勢不能於是宣帝下詔云吏皆勤事而俸祿薄欲其無侵漁百姓難矣遂加吏俸著於策書臣竊見今之結髮登朝

陳力就列其俸也不能致九人之飽不及周之上農其
祿也未嘗有百石之入不及漢之小吏若乃左右僕射
百僚之師長位莫崇焉月俸所入不及軍中千夫之帥
甚可駭也豈聖朝稽古之意哉臣欲乞今後百官俸祿
雜給並循舊制既豐其稍入可責以廉隅官且限以常
員理當減於舊費冗食悉罷周行自清臣又念唐虞之
制也凡預品官各設資考課其殿最歸於有司或歷階
以升或越次而補國朝多以郊祀覃恩因而稍遷考工

之黜陟不行士流之清濁無辨陛下深鑒其弊姑務惟
新昨有事於禋燔但徧加於階爵雖矯前失未振舊規
臣欲乞依舊內外官各立考限復令考功修舉其職每
歲置使校考以表盡公資秩改遷賞罰懲勸一遵典故
以振滯淹臣又念昔者成周之制也公侯子男皆列土
以建國大夫卿士並受田而無征西漢已來用秦武功
之爵唯列侯啓封或踰萬戶至關內侯或有食邑不過
數百家自是因循以至唐室但食邑者率為虛設言實

封者歲入有差殆及聖朝並無所給至於除拜之際猶
名數未移空有食菜之稱真同畫餅之妄臣欲乞依元
和中所定實封條貫支給削去虛邑但行實食以寵勲
臣臣又念國家每屬嚴禋即覃大慶叙封追贈罔限彝
章乃至太醫之微司厯之賤率荷蓼蕭之澤亦䟽石窀
之封恩雖出於殊常事不循於經制臣又以勲散之設
名品實繁律文以勲散為二官已經刪定故事加散官
至五品必以上聞今朝散銀青猶關命服護軍柱國全

是虛名臣欲乞自今以後常叅官勲散俱至五品者許
封贈官階勲俱至三品者許立戟每遇慶澤令有司准
式施行既禮秩之昭彰固名品之分別臣又以五等之
爵施之於今雖有啓封之稱曾無胙土之實苴茅建社
固不可以遽行翼子貽孫亦足徵於舊典臣欲乞內外
官封至伯子男者許蔭子至公侯者許廕孫別封國公
者許嫡子嫡孫一人襲封並令有司考求前制所冀國
朝無虛授之寵臣下知延賞之恩臣又以今之加功臣

之稱始於唐德宗幸奉天扈蹕將士並加奉天定難功臣之號因一時之賞典為萬世之通規近代已來將相大臣有加至十餘字者尤非經據不可遵行所宜削除以明憲度者昔講求典禮晉國以清考覈名實漢朝稱治當至化誕敷之際是舊章咸秩之時跂見太平正在今日臣學術素淺文理未明輒述狂言以塞明詔殞越於下啓處不遑干冒天聰臣無任省循戰汗激切屏營之至

代宰相賀商州進嘉禾狀

右臣等今日中使至中書伏蒙聖慈宣示商州奏據上洛等五縣耆壽戶長泉延義等狀稱今年秋夏按稼豐熟異於常年於田中摘得穀十二莖各長一尺五寸至一尺二寸及一莖兩穗三穗者本州差人齎赴闕者以食為天實生民之大本所寶惟穀乃載籍之格言苟非明德升聞靈心昭合即何以四時大順百物嘉生聿呈棲畝之样式慰有年之望恭惟皇帝陛下凝神玄扈躋

俗華胥恤民隱以載周侯農祥而靡忒以為春秋所重
最在於麥禾富庶之源莫先於稼穡明發不寐對越惟
寅下寬大之詔書召和平於時令故得五風十雨茂聞
愆伏之災千倉萬箱允洽豐穰之詠商洛素殊於瘠土
閭閻獲覩於秋成仍示羣符用彰玄錫東臯效祉既昭
報於憂勤南史當官但虔書於盛美臣等叨居近侍幸
覲丕休惟抃之誠倍萬常品


代僕射呂相公冬至謝就第賜宴狀

右臣今日中使某至奉宣進旨就臣私第賜御筵者玉帛禮燭已告成於吉土飲食宴樂俄垂象於書雲王人供帳於私門長者迴車於陋巷綺筵載設革戶生光此蓋皇帝陛下屬朝野之歡娛推君親之慈惠奉祠漢時嘉百執之惟寅書瑞魯臺慶一陽之資始特頒勞酒爰在敝廬殺核具陳金絲迭奏享大庖之饌徒媿屬厭仰當陽之威不踰咫尺感德共期於醉飽報恩益誓於靡捐

閣下謝賜御製南郊詩狀

右臣等今日中使至伏蒙聖慈賜臣等南郊禮畢五言
六韻詩一首依韻和來者上帝眷懷方陳於燭燎聖人
有作爰載於聲詩俯示顓蒙俾祛聾瞶幸覲昭回之采
得聞正始之音不覺味忘幾乎手舞恭惟皇帝陛下恭
承正統寅奉舊章卜郊兆以就陽神祇昭格奉玉帛而
來祭華夏駿奔爰掃地以貴誠乃備物而報本變輿出
次雨足灑途冕服升壇天光燭野動必訢合先而不違

實三靈之交歡諒百福以申錫而陛下允膺玄貺濬發
雅言曲示近臣咸令屬和況六君之發詠豈下士以能
窺雖効冥搜終成濫吹朱絃解慍已覩於變風良玉匿
瑕式希於藏拙免陳鄙陋有黷高明臣等無任云云



武夷新集卷十六

欽定四庫全書

集部

武夷新集卷十七

詳校官監察御史_臣李陽樾

檢討_臣何思鈞覆勘

總校官中書_臣朱鈐

校對官中書_臣葉炎

謄錄監生_臣馬紹基

欽定四庫全書

武夷新集卷十七

宋 楊億 撰

表狀六

二十五首

代僕射李相公承天節進經疏狀

右臣伏以河清九曲爰屬於休辰節紀千秋式遵於故事富壽之祝臣子攸同况臣本乏器能出於幸會望苑早參於賓護台司旋預於弼諧享厚祿之萬鍾奉禁庭之三接在具瞻之地無補於衮章荷洪覆之恩免傾於

鼎餗徒懷殞越莫報生成幸逢載誕之祥願益無疆之
算竊以大雄之教實為衆善之因輒就紺園式陳香供
命五天之開士誦三藏之玄言六時之梵唄精嚴八部
之龍神護衛奉焚修於西竺用集勝緣仰峻極於南山
克資介祉拂石永延於浩劫傾葵庶竭於下誠

代人次對奏狀

右臣次當轉對理合上言輒有見聞不敢緘默臣竊以
太祖皇帝建隆年中曾降明詔聿修隆典咸秩無文以

前王之功及生民遺廟之存於地志蕪廢者新其營構
頽侈者俾之繕完乃至封樹以增崇固亦樵蕪而申禁
使吉蠲之薦肅奉於常儀昭格之靈允懷於主德暨五
嶽四瀆視三公諸侯興雲雨以利人奠坤元而載物並
增嚴於棟宇用祇事於神祇當時樹立豐碑以紀成績
赴告青史式煥大猷歷今古以遐觀真帝王之能事也
臣前知河陽領祠濟瀆舊制長吏每月朔薦獻必示躬
親尋以為煩祇令春秋享奠祭不欲數雅合禮經神實

依人式資崇奉臣竊見朝廷所修廟宇剏葺斯久寒暑
載離或梁木摧頽或屋瓦滲漏漸成隳壞有爽精虔州
郡雖欲舉行動須申報俟符牒之往復必歲月之推遷
臣欲乞特降勅旨應前代帝王及嶽瀆祠廟自今後本
處長吏二時奉祠即令檢校或有疎損便許葺修仍破
省錢不須申覆如此則國之大事在祀典以惟寅神享
克誠亦陰騭之昭報千祀旒宸云云

代司空相公謝撫問狀

右臣昨日晚李沆等到臣私第奉傳聖旨以臣所患令
安心將治中書無事者處弼諧之任曾乏於謀猷乖攝
養之方自生於疾疚蓬華適居於假告冕旒仍示於記
憐特令當國之臣曲諭如綸之旨慰安彌極跼蹐靡遑
蓋念臣本出諸生素無遠略幸以遭逢景運際會先朝
但持孤直之心獲玷具瞻之地跛鼈安能於致遠短絆
非可以汲深袞章莫効於彌縫鼎寶每虞於傾覆爰從
策免復預疇咨雖竭肺肝曷裨塵露終荷保全之惠繆

升師長之崇皇帝陛下恭已奉先虛懷求舊式汙揆路
再冠台司比三入於承明殊非光寵享萬錢於黃閣尤
負覲慙宵衣豈減於憂勤尸祿唯甘於嘲誚果貽瞰室
遂致臥漳瞻八彩之眉暫違堯陛賜十全之藥便降秦
醫命星使以宣傳若天顏之咫尺荷照臨之所及誠殞
越以難勝敢謂特遣輔臣同過陋巷備形問訊益示溫
存教以安心俾達農皇之養命諭之無事蓋慮孔明之
傷神竊佩訓詞仰銜睿眷頓祛沈痼丹九轉以何功誓

報生成身一毛而為喻感恩之至涕無從

代侍講邢侍郎陳乞狀

右臣伏有懇誠貯於肝膈蓋屬禋燔之慶方覃渙汗之恩冒昧上陳忤忤自失竊念臣有亡兄某早承義訓少習文儒肄業膠庠服勤簡素頗有詞藻見推輩流俯鄰壯室之年未及命鄉之薦忽嬰疾疹遽至淪亡臣亡妻某氏是臣二親在堂為臣聘娶親執箕帚逮事舅姑躬調滑甘奉養晨夕而臣未升朝籍臣妻已拚泉塗靡及

湯沐之封徒切糟糠之感今者郊丘布澤幽顯懷仁臣
不勝同氣之親痛深終鮮勉思齊體之義情極悼亡罔
避鈇鉞之誅輒干旒冕之聽伏望皇帝陛下俯矜懇悃
特霽寵章俾臣兄沾贈典之微光生吉第而臣妻蒙追
封之命恩洽漏泉倘玄造之曲成乃微願之永畢誓傾
勤瘁以補遭逢

代宰相謝春社日賜御筵狀

右臣今日中使某至中書奉宣聖旨賜臣等御筵者候

靈星而置祠將興農作擇元日而命社爰舉國章和羹
方愧於素食推食遽蒙於飫賜此蓋皇帝陛下率遵時
令寅奉天時道協建中仁深逮下屬陽春之嘉節申宴
樂於近司飛觴俾極於醺酣折俎更均於慈惠歡呼飽
德唯驚饕腹之屬厭跼跼畏威但仰龍顏之咫尺共荷
雲天之施益堅金石之誠臣等云云

代宰相謝賜御製社日詩狀

右臣今日中使某至中書奉宣聖旨賜臣等御製社日

詩若干首令依韻和來者命社之辰聿當於春仲變風
之什獲覩於天章方蒙式宴之私忽奉言詩之賜此蓋
皇帝陛下思探繫表道合帝先宣雅曲於南薰阜財解
愠總乾文於東壁懸象著明屬品物之載陽矧穆清之
多暇爰紆睿思成是永歌居然治世之音至矣聖人之
作雲漢但光於凡目已歛曷繼於正聲徒忘味於齊庭
更驚魂於葉縣諒嗟嘆之不足實慶幸以同深臣等云
云

代司空相公寒食日謝賜御筵狀

右臣今日中使至奉宣聖旨就臣私第賜御筵者荆楚
歲時早傳於令節太原風俗爰舉於舊章方休澣於私
門忽頒宣於公宴此蓋皇帝陛下嘉天時之大順念春
物之載陽適因禁火之辰特示需雲之澤供帳旣光於
顏菴分甘仍出於堯樽華門迴長者之車懸腹飫大官
之膳樂以侑食固肉味之都忘酒乃合歡且羽觴之無
算感德唯期於醉飽省躬更誓於糜捐

代司空相公乞免賻贈狀

右臣今日中使某至私第奉宣聖旨以臣第幾男某夭殤特賜某物者晉相萬錢方致懸軀之誚童烏九歲俄纏舐犢之悲年未及於成人禍良由於瞰室敢謂恩加贈祿禮越彝倫况下殤之服紀素輕而宰司之俸入殊厚聖周之費固不至於慮居賻布之儀乃深為於躡等雖天慈之所及實公議以是憂豈惟增謗於素餐更慮害盈於陰隲伏望皇帝陛下俯矜忝冒曲示保全察茲

跼地之誠恕以扣閤之僭特令停寢用息怔忡干犯宸
嚴期於得請

代宰相謝賜新印道德經狀

右臣等昨日伏蒙聖慈各賜臣等新印道德經并釋文
各一部者伯陽立言首天地而稱四大馬遷約史先黃
老而後六經是開衆妙之門足助無為之化恭惟皇帝
陛下功侔亭育德合希夷清明在躬蓋凝神於姑射慈
儉為寶爰躋俗於華胥稽古訓以惟精訪遺編而大備

乃復欽崇妙道紬繹微言以為柱下史之書允為教父
河上公之注未洞玄關式因唐室之討論早在虞庠而
流布歲時寢遠頗多魚魯之譌方策惟新蓋出絲綸之
旨已成功於刊刻忽命使以頒宣臣等徒慶逢時俱慙
昧道心希漢相但清淨以為師學謝蜀嚴豈指歸之能
測唯荷記憐之造彌堅報効之誠

進洞霄宮碑狀

右臣昨奉勅令臣撰亳州洞霄宮碑文進呈者聞命魂

驚抽毫思軋牽罄驚拙綿厯旬時竊以玄元誕育之區
光靈未泯睿哲欽崇之旨修奉惟寅爰畢墜塗將刊琬
琰合咨大手用志新宮而臣猥奉僉諧獲當撰述乏色
絲之妙曷示方來叅衡石之餘空塵聖覽內循鄙陋尤
負覲慙其碑銘今已撰成謹隨狀上進干冒宸嚴

陳乞奏狀

不曾上

右臣竊以穹旻覆物所貴於聽卑臣子事君固許其無
隱敢傾肺腑上黷冕旒伏念臣本出單平素非茂族先

皇憐其好學實在清華陛下採以虛名驟加甄擢預諫
諍七人之列掌絲綸五色之言身紆三品之服章日奉
九重之朝謁實為儒之健羨誠受恩之寢深敢不策勵
疲驚服勤官次終虧稱職之譽空累知臣之明每循省
以若驚在報効而無所豈合更傾私懇上浼公朝蓋以
臣世異膏粱跡本羈旅負郭素無於別業北堂方侍於
慈顏自委質効官代耕得祿暮功相聚莫匪至親衣食
所資悉皆仰給雖職司之甚重在俸入以極微至於吉

凶慶弔之資僕馬薪芻之費凡百用度皆出其中諒饘
鬻糊口之不充豈甘旨養親之能及早者以迫於旅火
曾扣帝閣述屢空之可憂冀倒懸之或解而義輪晃朗
未照於覆盆河鮒焦熬愈悲於涸轍蓋念處掖垣清切
之地受帝王特達之知出入於金門玉堂陟降於赤墀
文陛苟尺帛寸粟稍有資儲夕膳晨羞不虧奉養且無
求於豐泰况粗守於廉隅又豈願以區區之誠上煩君
父籍籍之口騰誚搢紳既擠壑之是虞亦觸鱗而無避

伏望皇帝陛下道存惻隱仁極表微憫其聚族於京師
只請本官之俸料或館閣之內俾兼著撰之職司或旬服
之間特授藩方之憂寄庶稍沾於加給聊有救於固窮
其於燕谷迴春西江激水頓蘓暖律驟躍洪濶並出殊
私非敢有望

代駙馬王都尉乞書史狀

右臣輒寫愚誠上塵聖聽退循踰僭甘俟誅夷竊念臣
門襲素風家承緒業服膺為學爰自於青衿刻志窮經

誓通於絳帙本冀千名場屋濟美箕裘遽席寵於沁園
更冒榮於環衛彩纓就列敢矜戴鶡之雄挾策讀書尚
負亡羊之愧臣伏見國子學印本九經書并釋文史記
前後漢書三國志等蓋聖人之垂教或良史之立言咸
經校讎早備刊刻臣面牆有素閱市無聞徒堅學古之
心欲望賜書之寵上件書等伏乞聖慈各賜一本所冀
韋編屢絕獲探典籍之言木鐸載揚無辱文明之化臣
之鄙願實在於斯

代僕射李相公謝歲節賜御筵狀

右臣今日中使至臣私第奉宣聖旨賜御筵者端月標
辰方畢稱觴之禮需雲式宴俄推折俎之私分甘蓋自
於大庖供帳更榮於陋巷此蓋皇帝陛下嘉元正之首
祚屬開泰之膺期念休澣之文著乎甲令欲慈惠之澤
及彼近司爰就敝廬俾為盛集金絲合奏穀核具陳腹
滿社鷄共負屬狀之媿心傾園藿曷酬臨照之恩

代人轉對論太學狀

右臣位忝朝行次當輪對合陳愚瞽上黷宸嚴退省僭踰彌增戰慄竊以教化之本學校為先故國家開設膠庠敦崇儒術立成均博士之職遵祭菜鼓篋之規大集生徒俾加講習所以扶翼至教激揚素風然臣竊見博士之各專一經員闕而未備國子之並設六學職廢而不脩臣又見唐太宗貞觀中增築學舍至千二百間國學太學四門及書算律學生凡三千二百六十員及至軍衛亦給博士授以經業乃至三韓吐蕃高昌諸蕃國

並遣子弟請入國學增至八千餘人文德之盛超絕前
古今朝廷安靜聲明震灼而太學制度尚或未備況三
代之制王公已下子弟之秀者爰自總角即肄國庠仕
進不由於他途講學必行於考校故每歲兩館生冠郡
國之首齒胄之典興化是資今學舍雖存殊為湫隘生
徒至寡僅至陵夷貢部以鄉舉為先諸生以兩館為耻
塞原拔本莫甚於茲臣欲乞精選五經博士咸備其員
大啟國庠增設學舍少給廚廩賜以本錢然後明勅公

卿大夫凡子弟纔及弁髦即皆隸籍夏弦春誦咸舉舊
章小成大成率如前典貢部取士必以兩館居先周行
厯官皆由博士為重然後並修諸學式協前規使禮讓
興行風俗淳厚追蹤三五坐致太平端拱無為翹足可
俟

代中書請聽政狀

右臣等伏以先后升遐宸衷哀慕痛深創鉅擗標傷摧
殆茲彌旬恍然在疚雖三日聽政備遺誥之丁寧四表

叫聞聲羣情之懇到而詔旨敦諭形於未忍朝野惶駭
罔知所圖竊以機務至繁不可以暫曠治命至重不可
以輒違况自先后聖體弗康載離寒暑皇帝陛下衣不
解帶藥先必嘗躬禱神祇徧走羣望親候安否日至寢
門或常膳之載加然乃御食雖中夕而屢起靡敢寧居
動靜承顏勤勞不匱天子之孝載籍所無及茲上僊追
懷罔極充窮永感諒闇不言臣等獲造倚廬面陳至懇
願以宗社為念少抑哀懷望遵顧命之文俯臨庶政而

易月之制聖情誓守於几筵宅憂已來天顏殆至於樂
棘臣等兢惶屏息不敢仰視伏望陛下循祖宗之舊典
克保彞章稟母后之遺言勿違慈旨節哀順變式協前
經垂拱嚮明躬決庶務以天下而為大計俾羣臣而覩
清光如此即長樂如在之靈寶歆孝德有司各揚之職
不柰官常所繫非輕期於得請

代王寺丞為弟乞應舉狀

右臣輒寫私誠仰干聖聽退量僭越甘俟誅夷伏念臣

門襲素風家承緒業自先臣之淪逝乃賤族以替凌臣之二兄並參朝列俯鄰一紀俱揜泉扃唯臣與弟鄉貢進士貽序勉紹箕裘恐隳堂構永懷陟岵但深罔極之哀相顧在原同勵自強之志微臣幸緣世胄獲踐官常臣弟刻苦藝文服勤簡素誓求一第用慰九原咸平四年冬叨京府之薦能預澤宮之試藝雖從退黜靡敢怨尤益堅學古之心庶遂起家之望今歲已頒詔旨大啟貢闈南郭吹竽豈容濫吹東堂折桂咸激壯圖而臣私

室延災長主薨背方纏哀於戚里難旅進於名場然而
情迫由表理須犯上蓋以臣弟齒髮已踰於壯室姓名
尚在於白丁以舊相之遺孤與編氓而等列辛勤硯席
殆過於十年嗣續衣纓未沾於一命况稀逢於鄉舉憂
漸墜於門風伏望尊號皇帝陛下念微臣閭閻之微哀
憫臣弟身名之蹭蹬不令公輔之後夷於平民俾預賢
能之書升于天府苟得齒四方之貢士蒙再試於春官
妍蚩雖卜於至公存歿實銜於大造

代許州李相公陳乞狀

右臣伏有懇私須干聖聽退循僭易甘俟誅夷蓋念臣
兩日前獲奉宸遊親陪宴射侍天顏於咫尺廁鼎席之
崇高在鎬飛觴但驚於無算飲河滿腹自媿於不任而
重瞳曲賜於撫存方寸彌增於感激適對顒顒之當宁
頗成喋喋之多辭雖覆幬之見容亦諠譁之是懼且念
臣斗筭之器素狹犬馬之齒已高霜玉笋之餘旣難勝
於天漿接公槐之列徒負愧於朝倫况今享勞有期將

均於慈惠台衡之任實冠於搢紳或舉白之如初必裁
冠而致誚空自成於貳過益有玷於具瞻伏望皇帝陛
下曲賜保全深垂矜察俾不令於引滿庶免至於失儀
顧瀝懇以由衷亦懷憂而失據仰希慈造特允下誠

代中書乞免和御詩狀

右臣今日中使至伏蒙聖慈賜臣等御製契丹出塞將
議迴鑾五言六韻詩一首令和來者萬乘時巡六羸宵
遯款塞願修於舊好息民姑務於遠圖烽塵已靜於龍

荒鑿輅將旋於象闕式啟和戎之利佇臻偃伯之期皇
帝陛下深念生民靡辭於櫛沐聿脩神武期息於干戈
念驕子之乞盟俾行人而答聘果通歡於異域將旋軫
於上都爰形風雅之言用導憂勤之旨頌聲載洽克彰
正始之音玄象式瞻但賁昭回之彩臣等繆塵台席獲
奉宸篇已欣凡目之榮觀更俾庸音而繼和竊循懵學
空効冥搜雖強綴蟲文豈有成章之美而共慙鳧脰虔
祈護短之仁敢望恩憐曲垂矜免

兩制謝賜御詩狀

右臣今日入內侍高班趙誠信至奉傳聖旨賜臣等
契丹出境將議迴鑾五言六韻詩一首令依韻和來者
天驕犯塞鑾輅時巡繼好息民式啟和戎之利迴轅返
旆將聞振旅之期慰生民俟后之心叶載籍止戈之義
皇帝陛下躬親櫛沐蒙犯風霜巡細柳之營貔貅賈勇
賦大風之什雲漢垂文克宣治世之音實顯聖人之作
臣等謬忝司言之任慙無護蹕之勞辱示宸章俾窺睿

藻壁月珠星之彩既獲於仰瞻陽春白雪之篇仍容於屬和拭目之榮雖積燥吻之慮彌深徒共挾於荒蕪誠預慙於鄙淺感懼之至殞越無從臣等云云

代集賢寇相公謝就宅賜宴狀

右臣今日中使至奉宣聖旨就臣私第賜御筵者清蹕班旋方洽弭兵之化私門休澣適欽逮下之仁如綸忽奉於宣傳折俎特頒於宴飲此蓋皇帝陛下道侔洪覆澤被含生以百姓而為心御六龍而展義爰及迴鑾之

慶將臻偃伯之期俯念從臣曲頒勞酒王人供帳御膳
分甘荷推食之恩但共懷於慈惠顧飲河之量實同媿
於屬厭仰戴高明豈任殞越云云

代叅政王侍郎陳乞狀

右臣偶嬰微疹特簡皇慈降中使以撫存命大醫而診
視內慙鄙陋無補休明榮衛愆和自寡攝生之要穆清
軫慮曲迴乃眷之仁仰荷照臨彌增殞越况昊穹洪覆
過私一介之軀而藥石蠲痼顯著十全之効只於晷刻

便冀痊平然臣竊有懇誠難從緘默實不遑於肺腑須
上瀆於冕旒蓋以臣自拙將調致茲疾瘳然朝謁之無
廢亦飲食之靡妨風毒所成已積日彌年而如此平復
如故諒匪朝伊夕以難期今者天獎殊常聖恩優厚每
遣近臣而臨問特輟中尚以療治顧腠理之甚微煩星
輶而屢駕勞君親之軫惻在啟處以怔忡其所差到內
使醫人欲乞不令逐日看候或有求取之藥餌俾令修
合以供須亦漸冀於蠲除庶不成於沈痼苟俞所請實

戴殊私

代宰相春社日賜御筵狀

右臣今日中使至奉宣聖旨就中書賜御筵者吉日惟
戊克遵命社之文退食自公忽挹當衢之味此蓋皇帝
陛下念方隅之底定嘉品物之載陽屬勾龍之祀典唯
寅且田畯之農祥始正條風啟序膏雨應期玄貺薦臻
豐年可冀爰順發生之候特均慈惠之私式霈湛恩俾
為盛集酌金罍而引滿同懷既醉之心享玉饌以屬厭

更負素餐之愧仰被涵濡之澤彌堅報効之誠臣等云云

南郊奏舅狀

右臣輒有懇私上煩君父蓋屬嚴禋之慶仰祈錫類之仁既內迫於肺肝固難逃於鼎鑊臣有親舅張僅年四十歲是臣母親弟素通書記兼習刑名緣藝業不至於專門且齒髮已登於強仕進難干於場屋歸仍乏於田園臣外祖項仕偽邦累宰劇邑所得俸入盡買圖書項

彰清白之名蔑有膏腴之產下世纔離於寒暑尺椽莫庇於子孫故臣舅自來只在臣處均衣共食厯歲踰年臣去冬幸因載誕之辰曾漚由表之懇屬以釐革外姓莫遂私心今者玉帛祀天雷雨作解允澤咸均於動植皇明俯燭於幽微臣是敢重寫危誠再祈玄造伏望皇帝陛下矜其悃悞恕以僭踰憫臣爰自孩提臣母已嗟孀獨自幼齡而鞠育微臣曷報於劬勞顧外族之替凌臣母每多於傷感敢冀陛下念臣之遭逢有素察臣舅

之蹭蹬無圖特霈異恩獲霑卑秩俾臣於晨昏就養有
慰於慈親即臣非土木無知終報於明主跼蹐俟命啟
處不遑

納南郊所加恩命乞迴授親舅狀

右臣輒披肺腑上干君親蓋緣危迫之誠難避誅夷之
曲臣有親舅張僅年四十歲是臣母親弟外祖頃在江
左嘗事僞邦宰邑字人周旋數任頗著循良之政見譽
當時誓敦清白之規以遺後嗣凡得俸入盡買圖書並

無田園可庇親族下臣纔踰於期歲臣舅已歎於流離
微臣自忝官榮臣舅遂相依倚均衣共食歷歲踰年雖
逢下武之期且乏專門之藝昭代無從而進取流光漸
歎於蹉跎前年因祝壽之休辰適推恩於近列臣曾陳
章奏仰扣高明雖迫切於私心方釐革於外姓去歲嚴
禋云畢慶澤遂行臣亦首露血誠上塵天聽庶於臣舅
獲被鴻私二年並竭於丹衷一命未諧於始願竊以人
倫情義唯外族而最優母黨姻親於舅氏而為重况臣

爰當稚齒臣母已是寡居撫養之仁劬勞備至顧外門之哀謝且臣舅之羈孤痛傷之懷宸昏在念臣是敢更冒萬死再瀆九重欲乞納臣昨者南郊所加朝散大夫及爵邑戶封與臣舅換一卑秩冀霑寵渥用慰慈顏伏望皇帝陛下念臣幸以蠢愚特蒙甄獎獲預代言之任別無出位之思蓋迫庭闈之情須犯冕旒之聽兼臣有三人親弟並已長成凡再遇於覃恩未敢干於當宁實緣臣舅單孑無依敢冀俯察由表特迴殊造許令臣陳

納所加恩命迴示臣舅一卑品末僚自葉流根儻荷涵
濡之澤摩頂至踵誓堅報効之誠

承天節奏親弟化狀

右臣任忝司言節逢誕聖屬推恩之云始輒滙懇以上
陳內省僭踰實甘誅殛臣有親弟化與臣爰從幼稚即
歎羈孤共出寒微親加訓勗頗服勤於素業亦俯近於
壯年適鍾下武之期竊有起家之望以臣獲掌書命忝
備掖垣屬虹渚之降祥庶鵠原而徼寵伏望皇帝陛下

察以由表之懇憫茲同氣之親雲天特霈於異恩州縣
俾參於微秩冀獲代耕之祿用為舉族之榮在於庸庸
敢忘報効

武夷新集卷十七

欽定四庫全書

武夷新集卷十八

宋 楊億 撰

表狀 十九首

再乞外任狀

右臣近者瀝懇拜章祈天俟命願諧典郡庶獲養親逮
今旬月之間未奉允俞之旨內懷危切實不遑寧須再
述于愚衰期必迴於聖聽伏念臣早緣薄技謬玷近班
迎侍安輿聚居帝里既代耕而有祿固盡室以相依棲

輦轂以食貧已六遷于歲律厠掖垣而承乏又五及于
王春桂玉是憂旨甘多闕矧又久叨塵于清列莫演暢
于皇猷以愚直之姿素昧毀方之理在孤平之跡常懷
履薄之危皇帝陛下曲示含容特加保庇且令備位未
忍黜幽臣固非土木之無知豈忘君親之大造雖然履
載之量姑務于包荒其如方策之言亦旌乎知退苟上
煩于澄汰亦何表于廉隅况今外公議以是慙內私誠
而尤迫臣母久違故土深念於鄉閭臣弟寄食妻家莫

均于饘粥臣亦叨榮累歲無補休明聚族神州久嗟僑
寓朝廷就列上惕于官箴晨夕問安中煎于旅火伏值
陛下道光孝治恩厚曲成望推錫類之仁俯察由衷之
懇于江浙之封部擇僻小之方州假以使符遂其私便
慰臣母懷歸之念免臣弟漂泊之嗟有職田祿粟之資
備夕膳晨羞之費臣敢不盡心為治竭力從公分旰食
之憂勤宣寬大之條詔期于盡瘁少報萬分

承天節奏親弟佻狀

右臣職司視草慙無東里之才節值流虹方罄南山之
祝輒祈恩于宸極冀延賞于私門內省僭踰啟處無措
伏念臣有親弟習進士球爰從幼稚即歎羈孤訓靡及
于過庭貧不遑于學稼自微臣之食祿奉慈母以供甘
提挈以至于上都鞠養殆踰于冠歲辛勤弦誦粗知學
古之方似續衣纓竊有起家之望今者慶逢鳴社澤被
周行不勝同氣之情須黷至尊之聽伏望皇帝陛下俯
察在原之懇稍覃作解之仁推一命之恩俾霑榮于黃

綬齒四民之列免負媿于白衣深慈既被于天倫薄質
惟堅于臣節祈天俟命顓俟允俞

代集賢冠相公謝賜晉書狀

右臣今日中使至奉宣聖旨賜臣印本晉書一部計六
十九冊者兩晉遺編具列祕書之目九重稽古新成鏤
板之功夫何寡聞仰膺蕃錫伏惟皇帝陛下續戎御極
執契臨人負將聖之多能尚觀文而闡化以史筆之所
記有龜鑒以具存魯魚特命於校讎方牘更加于摹印

俾前言之不墜亦副本之廣傳臣謬預持衡寔慙昧道輒上干於宸扆果垂錫於策書學古無功固已嗟于扞格傳家知幸但永誓于緘藏恭承臨照之私益勵傾輸之節

代中書賀宣示合穗麥狀

右臣今日伏蒙聖慈宣示奉先禪院後面麥地內生出合穗麥者上玄降祐多稼呈祥克彰純嘏之休式契豐穰之兆臣等竊以載籍所重實在於民天瑞典攸徵莫

先於年穀矧惟首種之利最為艱食之資厯三時而有
成已彰大順秀兩岐而發詠允叶元符伏惟皇帝陛下
慈儉居尊憂勤御下先天發令運神化于無方盱日視
朝體健行之不息引萬方而在已以百姓而為心故得
洪覆眷懷殊祥薦委和陰陽之玉燭靡愆離畢之占盼
原隰之龍鱗式覩如雲之稼而况景風適至宿麥將登
更彰合穗之奇用薦有年之瑞升歌九室足播于樂章
記事三長永光于史筆臣等叨居輔弼無補聰明幸矚

休禎徒深慶抃

謝宣召赴龍圖閣宴會及觀御製御書狀

右臣今月某日伏蒙聖慈召赴龍圖閣觀太宗之御製御書及聖製碑贊并四庫圖書仍賜御詩兼預宴會者上帝藏書肇開冊府聖人有作爰勒金碑許拭目以榮觀寔捫心而知幸伏惟皇帝陛下順考古道啟迪人文執左契以御庶邦運太鈞而播羣品車書無外咸歸輿地之圖弓矢載橐式開仁壽之域而乃講求前訓潤色

大猷擬石渠天祿之舊規聿新層構搜汲冢羽陵之墜
簡並集羣言敷奉先思孝之心顯繼志守文之盛恭以
先朝之述作為後世之楷模萃手澤于縑緗窮筆精于
翰墨秘宸編于延閣用垂示于方來奮睿藻於貞珉式
翰揚于盛美金石頌德實曠古之無階雲漢成章亦羣
生之共覩眷惟近列首獲仰瞻側管窺天寧測蓋高之
量聞韶忘味徒萌竊抃之心矧又賜玉笋之醢醪示柏
梁之絕唱飲河之腹既嘆于屬厰下里之音靡容於緘

默並陳巴拙上黷皇明雖蒙善下之仁終抱黷尊之媿
內循孱薄曲荷恩私閱東序之圖書奉文思而知幸陪
西清之宴豫沐慈惠以難勝唯共誓于糜捐庶少酬于
臨照

謝批荅狀

右臣近者恭陪鎬飲仰覲乾文實揣己以知榮輒拜章
而叙感猥蒙批荅備極恩私捧讀周旋慶抃交集伏惟
皇帝陛下道高列辟功濟中區體神武以懷柔法天明

而覆幬撫羣生之重畜朽索居懷考歷代之元龜青編
在御肇新宏構總萃前言先朝之奮藻摘華並藏麟閣
聖主之披文相質高揭龜趺因萬務之餘閒召諸臣而
宴喜金簡玉字既容下士之竊窺白雪陽春更許巴人
而屬和仰奉觀文之德薦承飫賜之仁共慶遭逢徒深
踊躍爰陳奏牘虔述寸誠敢謂陛下濬發睿謨俯頒優
詔曲形敦諭倍極恩慈演絲為綸聞聖言而知感摩頂
至踵勵臣節以彌堅誓畢微生少酬立造臣無任云云

代中書謝賜聖製乾坤寶典序狀

右臣今日中使至伏蒙聖慈賜臣等御製乾坤寶典序各一本者星使俯臨宸章下賜莫窺玄遠徒極歡呼竊以頒歷授時前王之令典觀文察變大易之格言故璇璣齊政於有虞銅渾設象于東漢珠連璧合定疏密於諸家夏造商因分指歸於三統是以陰陽之學著於九流義和之官列于百執歷代而下何莫由茲然而象緯之文頗多脫簡星歷之史罕或研精金匱石室之中既

紛紛而無紀宣夜渾天之術亦涉獵以非工允屬欽明
疇咨古訓聿修茂典光集大猷伏惟皇帝陛下道邁帝
先智周物表自天攸縱將聖多能執古御今視八方于
指掌窮神知變韜萬化于襟靈而乃懼司厯之失官慮
疇人之廢業盡搜亡逸大補闕遺分別部居刊正譌謬
典乾坤而脗合肇建嘉名法雲漢以成章更行睿藻誕
揚能事式冠首篇臣等數日前被召穆清獲親冊府幸
覩聖人之述作實為後世之楷模輒祈副本以頒宣庶

遂洗心而披繹敢謂俯從人欲曲允下情卿雲發祥已
竊窺于凡目玉牒不祕更傳寶于私門內惟情昧之姿
得味淵冲之旨瞻天莫測遊聖無階仰法穹旻見勛華
之稽古奉傳簡策有南董之當官伏望宣付史臣播于
直筆豈獨臣等幸甚實亦天下幸甚

謝賜批荅狀

右臣近者恭承天獎獲覩聖文共拜封章上塵睿覽猥
承批荅曲諭宸襟捧讀再三兢榮失措伏惟皇帝陛下

文思撫運勤儉化人錫純嘏于昊穹散皇明于普率撫
柔諸夏煦嫗羣生一戎而不復用兵三變而遂至於道
然而探玄物表索隱天倪衡石自程雅得觀書之趣崆
峒順拜未忘好問之心賸萬象于毫釐括九流于指掌
眷惟律厯垂示吉凶慮南正之失官或疇人之離次博
求墜簡採摭羣言定黃鍾累黍之差正晉承渡河之謬
聿新制作傳信方來仍枉神臺序其能事兩曜合璧察
時變以無疑五色成文覩天章而在上夫何惜昧並預

頒宣聽廣樂於彤庭彌增愴恍得玄珠于赤水但冀緘
藏輒希付于石渠庶永傳于汗簡恭承明詔深諭至懷
靡狗下情曲形睿旨仰乾坤之謙德無得而名諒河洛
之祕文有時而出在聖神之垂範豈愚瞽之能知唯荷
戴于鴻私永鐫銘于丹腑

謝中使傳宣撫問狀

右臣昨日中使至臣安下處奉傳聖旨以臣所患特加
撫問者王人薦降天語載臨側聞綸綍之言頓愈膏肓

之疹省循備至感懼交并伏念臣本自諸生獲逢休運
非丘園耿介之秀無公卿籍甚之名弄翰為文不過篆
刻濯纓筮仕最處羈孤皇帝陛下過聽庸虛薦加寵擢
俾升禁掖式掌訓詞居清切之司冒榮斯甚草寬大之
詔稱職無聞積日彌多妨賢為愧今者攝生寡要遘疾
自貽度越旬時曠廢官守嘗趨期會幾踣于軒墀再奉
德音特頒于假告式加調理漸冀痊平敢謂濬發宸慈
特矜賤跡九霄之上命星使以俯臨四壁之中迴天光

而下燭荷記憐之殊造感存卹之深仁寸心但誓于捐
軀危涕不知其濡睫勿藥斯喜幸漳浦之有瘳戴天彌高
覺泰山之非重顧餘生之未泯必盡瘁以為期

代中書乞免和御製南郊詩狀

右臣今日中使至伏蒙聖慈賜臣等御製南郊七言六
韻詩一首令依韻和來者因長日以陳儀方修誌祀體
大風而發唱爰著雅章俄賜及于近司實光生于凡目
伏惟皇帝陛下先天合德下武膺期以明察而事二儀

用慈儉而撫諸夏外薄四海罔不懷柔日覽萬幾未嘗
暇逸致羣生之茂遂果玄德之升聞乾符坤珍薦臻于
純嘏雁山雞塞永息于祆氛遺黎得覩于承平率土方
躋于仁壽百姓莫知于帝力一人思報于天功乃因周
正之辰恭修漢時之祭弁冕端委率禮彌恭珪幣牲牢
無文咸秩故得三日先甲密雪清塵六師纂嚴光風拂
衽盱眙昭答福祿來同克符永錫之祥用洽無疆之祉
而陛下恭膺景貺濟發睿文窮六義之淵微導三神之

眷祐聖人有作幸獲于仰瞻下里何知更令于屬和共
循荒陋但極憂兢雖効冥搜終成累句陽烏委照爍火
豈敢以呈輝軒鑑高懸嫫母或期於掩惡必希矜免庶
息怔忡

代中書謝寒食賜御筵狀

右臣今日中使至奉傳聖旨就臣私第賜御筵者火禁
肇修方遵于時令宴私云洽曲被于天慈衡門供帳以
生光鼎食素食而是懼此蓋皇帝陛下嚮明求理逮下

均恩爰當出沐之辰曲霈分甘之惠大官先置曷勝推
食之仁小人屬厭但極飲河之量荷照臨之所及實循
省以增榮

謝駕幸編修所狀

右臣昨日伏蒙聖駕臨幸編修所者竹簡汗青方勤於
官次金輿旋轉俄燭于天光表宸極之眷懷聳士林之
觀聽臣等竊尋往謀載考舊聞稱制石渠甘露遂成於
故事修書仙殿開元肇錫于嘉名為儒墨之殊榮乃帝

皇之巨美恭惟皇帝陛下端居清宴博考前言日昃勞
謙疇咨好問賁帛旁求于髦彥榮河上薦于圖書乙夜
觀文每自程于衡石秋風發詠實光被于莞弦而乃允
迪睿謀聿修祕典發凡變例同宣聖之授經欽明文思
見陶唐之稽古臣等並慙禱昧虔稟指蹤抱慙懷鈐服
勤於夙夜持螭側管窺測于高深挾小智于胸襟冀成
書于旦暮敢謂陛下特迂羽葆垂顧鴻都親閱縑緙深
形問訊數刻尚迴於玄覽羣臣徒仰於清光慙無善對

之才莫奉好文之德矧又臨軒前席並示於延登厥筐
兼金更均于寵錫荷綸恩之渥綈增藝圃之光輝敢不
內省庸虛共思罄竭拜君之錫彌懷虛授之慙為儒之
榮曷報非常之遇

次對狀

右臣職忝掖垣次當言事合伸鄙見上浼宸聰臣竊以
求材審官方今之急務振淹擢雋稽古之令猷故擇善
而稱選衆而舉者三代之彞章下詔郡國懸科有司者

兩漢之茂典不仁斯遠得士乃昌垂于策書誕彰格訓
恭惟國家承五代之季開萬世之基三葉重光九疇式
叙至于並建衆職無曠庶官搜揚仄微登進茂異崇澤
宮之選復試可于廣庭設制科之目親延見于便坐時
下尺一俾公卿而論薦申命外計分縣道以察廉乃至
植諫鼓以來直言置公車而遵舊典開自薦之路擢不
羈之才萬幾之繁疇咨聽納一介之善拔拭進用蓋于
天下賢士大夫無所負矣然或前代之經制載籍之舊

聞未之申明有所闕漏此亦可惜焉臣竊見今吏部流
內銓凡幕府州縣之職盡得考其殿最引對軒陛黜陟
之命稟于宸旨資品之格循乎定規茲所謂官修其方
事無矯舉者矣而書判之設亦足辯材而國朝已來未
嘗責實逮太平興國之初始定等第優劣申以陟降之
命強學待問之臣頗獲于褒陞竊祿無狀之人亦加于
懲艾汔今遵守成憲下無間言其于慎重官人澄汰繆
濫畫一之法既盡美矣若乃搜羅羣萃登擢髦俊旁求

之義尚或闕如臣竊見天下吏員幾于數千罷秩去官
出入選調其人固已多矣先儒稱三人有師前王恥一
夫不獲而詵詵濟濟豈無懷材藏用角立穎脫之人但
恨取之之術有所未盡且唐制吏部有博學宏詞書判
拔萃平判八等三科蓋求之于常調中非為草澤設也
伏望皇帝陛下特詔冊府講求舊章申飭天官奉行故
事刈其翹楚被以寵靈下既無于滯才人亦聳于學古
如此即思皇多士近比成周之隆允釐百工遠追有虞

之盛干犯宸扆伏俟採收臣無任云云

封駁銓司主事王太沖狀

門下封駁司右今月三日中書發過劄子流內銓主事前撫州宜黃縣主簿王太沖特授大理評事依前充流內銓主事者竊以朝廷稽方策之文修班爵之制所以辯品流之清濁峻堂陛之等威克敦稽古之風俾絕濫官之謗蓋有國之令典致治之大猷也謹按六典大理評事十二人掌出使推案凡本寺斷獄皆連署焉自唐

室已來並預三司之案勘而近年之制或貼三館之職
名苟非士流不齒茲選況秩參卿寺官有常員竊尋歷
代之規罕兼流外之任忽頒新命恐紊彛章儻以王太
沖經術登科無嫌于除授在于銓衡祇役固合于解停
庶官守之有倫實國體之可惜臣等忝司封駁合具上
言伏望宸慈特迂聖斷

代中書請依詔頒行畫龍祈雨法狀

臣等伏以先天合德易象攸稱勤雨憂民策書所紀恭

惟皇帝陛下光膺駿命奄宅中區視百姓以如傷慮三
時之有害博訪弭災之術期臻阜俗之方或稍屬於亢
陽即徧走于羣祀恭修禳禳薦薦獲感通觸石興雲俄千
里而雨集力田望歲果百谷以秋成信雩禜之有徵由
穹玄之降祐式頒明詔誕告庶邦永消愆伏之虞同躋
仁壽之域臣等叨居輔弼仰奉憂勤燮調之効無聞將
順之誠彌切願奉宣于睿旨庶太庇于羣黎伏請付有
司雕印頒行天下

代中書謝秋社日賜御筵狀

右臣今日中使至奉傳聖旨以社節特就中書賜御筵者西成屆候幸當命社之辰北闕宣恩式需需雲之象示宴私於著位布慈惠於當陽此蓋皇帝陛下嘉品物之豐登因令文之休澣堯厨推食穆醴分甘有司供帳以載嚴近侍影纓而咸集既飽以德但媿於屬厭退省其私更慚于尸素荷照臨之所及諒報効以何階

進夔王周王誌文狀

右臣先奉勅撰故夔王周王誌文者竊以奉大君之明
詔紀賢王之令猷爰刻貞珉以誌幽壤自非鴻筆曷振
清芬如臣者謬典王言久塵官次發揮寡譽尸曠懷慙
豈謂宸慈更令譔述祇膺嚴命伏用兢惶輒已罄竭謏
聞奉揚遺懿屬詞之妙旣異于色絲褒德之稱敢同于
華袞徒躑躅以燥吻實忸怩而厚顏蕪穢頗多悚惕茲
甚其志文二首謹繕寫隨狀上進云云

進邠州靈應公廟記狀

右臣奉勅撰邠州靈應公廟記聞奏者恭膺睿旨度迷
靈休無史遷敘事之才乏士衡患多之思怔忡捧詔僊
俛成文參乙夜之觀空塵聖鑒載職方之志曷示將來
內省空疎不遑啓處其記文謹繕寫隨狀上進云云

代宰相謝賜重陽日瓊林苑宴狀

右臣伏蒙聖慈特就瓊林苑賜宴者無射司辰登高屆
候萬斯箱之慶方屬有年三令節之遊備存故事敢冀
需雲之澤曲推湛露之私此蓋皇帝陛下大德庇民至

仁育物當車書之無外因朝野之多娛謹頒令以授時
爰示慈於式宴矧惟仙苑近在商郊靈沼始波動周雅
躍魚之詠高臺在望揜南朝戲馬之名爰偶嘉辰是陳
良會大官先置極萐莆之珍羞飛蓋相追邁龍山之遊
集矧復霑玉笋之餘漉泛金菊之繁英紳組相輝笙絲
迭奏聽鈞天之廣樂恍疑夢寐之中預玄圃之勝遊迥
在風塵之外徒感恩而盡醉慚報德以無階

書 六首

答史館查正言書

某再拜正言學士足下頃者前襄陽張令至辱示手筆
備形慰誨耽翫無數鄙吝都遣客塵洞分神明來舍涼
若醍醐之灌頂快如曜靈之炙背荷知識之啓迪為昏
愚之歸救幸甚幸甚然障覆重複義趣深遠或所猶豫
固容咨決竊味雅旨有簪組非累身之說蒙有滯焉蓋
念無始輪迴積劫孤露偶薰習于種子獲遭值於仁賢
幸於此生得悟本性而前塵外境如芥絲亂繩本覺妙

心殆秋毫野馬舉為牽制動即淪胥先德亦云道力尪
微必處靜而能昭宗門所謂悟解超頓須漸修而乃成
儻或以初殖之德牙淪無邊之愛網沈浮陰入之界趨
走聲利之場自以了達苦空脫去事理謂生死而無怖
謂富貴而儻來此適足以長無明支成增上慢若夫現
三十二應化千百億身居士王臣隨方設教猿猴鹿馬
與物利生此須功行圓成福智滿足登地證果乃及于
斯自餘涉川救人未免俱溺哺糟處世何能獨醒載尋

善誘之言蓋有造微之旨豈非慮鄙夫尚迷真諦猶戀
榮名便令捨去恐致迷悶然固陋之志亦小異焉儻壽
量頗延緣累自薄當俟夫四五十須背俗息見反本循
元修天台之止觀專曹溪之無念庶于此報必證菩提
俟兜率下生龍華後會為主伴請轉法輪對越人天
親受佛記雖二乘而弗學豈三界以能安惻惻之心實
在於此足下衆德普會八部歸依暫現宰官之身常修
菩薩之行濟度羣品引翼有情作十園林具四誓願傳

受心印直指不疑演說色空辯才無礙儻矜其可教望
惠之好音所期奉以周旋不敢失墜或理參邪見旨失
真宗未至膏肓可施鍼石亦希提獎無便棄捐幸甚幸
甚秋氣變衰王事鞅掌強食慎疾副茲瞻顙

荅李寺丞書

某再拜昨晚辱示真蹤備形雅旨屬以專介迨於嚴扃
率爾奉酬缺然未足及再加紬繹贖其會歸如聆玉音
若抽繭緒酌之不竭鑽之彌堅何詞辯之縱橫文采之

巨麗俊發若此其誰敢當然士君子之立身大丈夫之
處世當以道義為勝負豈以位貌為等差故仲尼不過
陪臣子雲僅至執戟賈誼止傳于梁國梅福纔尉于南
昌皆名震方來道冠天壤寧與夫司馬善宦四至九卿
曲逆陰謀啓封萬室條侯倨貴盧杞奸邪享列鼎之榮
據三事之位同日而語耶矧君侯富有春秋老于文學
承閥閱之後若單平之家生綺紈之中挺布素之行凡
所著述必得作者之風至于游從莫非一時之雋心無

城府言成陽秋以孝謹著於閨門以寬厚伏於儕輩臨
事剛決而能斷結交悠久而不忘譬諸椒蘭人所服媚
由夫桃李下自成蹊實為卿材居然國器而未引金門
之籍未踐赤墀之塗藏器甚深括囊靡露困于卑位形
於詬言愚以為君侯德美既彰富貴何遠亦猶黃琮蒼
璧必以禮天神地祇明月夜光終須置掌握懷袖所宜
居易以俟待價而沽乃為乾坤之珍符皇王之寶玩苟
自躍於治求為鎮鄒來獻於庭願剖荆璞或未見辯反

謂不祥此交遊之情鄭重之至也君侯明達聰悟專柔
直方修飾廉隅佩服名教三揖而進願保格言一擲成
盧何為得雋更味環中之旨勿貽動者之譏况才識並
優英華外發珎珎縹緲組誠天理之必然霧隱泥蟠蓋時
命之未會耳幸惟曠度見採狂言式懋永圖克保全德
不勝喋喋之至

荅并州王太保書

并州太保麾下近於集賢石君表臣處得手筆一封耽

翫再三不能暫捨文彩煥發五色以相宣理道貫通有
條而不紊薰風拂社自然析酲簫韶在懸殊覺忘味何
厚賜之所及見久要之不忘甚善甚善竊伏自念江表
布衣材出人下非山東閭閻之後無負郭膏腴之產徒
荷世業遂參儒流齟齬之年傳名詣闕弱冠之歲通籍
於朝擔簦躡屨既周於四方抱槩懷鉛亦幾乎十載何
嘗不咨諏先覺博求同人直諒多聞必取乎三益談窮
勢賄克慎乎五交慄慄然唯懼當世之賢豪見拒而不

容也數年前石氏西齋邂逅相遇盱衡抵掌坐客盡傾
枕麴藉糟羽觴無算亦既卜夜至於繼燭剖心析肝蕩
無城府講道論義芬若椒蘭傾蓋如此故謂之矣未幾
邊郡思又足下既驅十乘而啟行國書成功下走亦一
麾而出守地里遼遠誠馬牛之不及官守縈繫同匏瓜
之見拘無復裁咫尺之書述固陋之懇去年僕祇召西
走來朝帝庭足下方鎮并門式遏戎略引領北望緬懷
故人恨不得解籍金閨從軍紫塞依蓮汎水陪幕府之

賓從投壺雅歌奉郡齋之遊宴今年肇自書殿入陞綸
闈以雕蟲篆刻之才當典謨訓誥之任五穀之稊不能
成虎豹之文一割之刀固無剗犀兕之利方夙夜愧惕
懼忝君命為知己羞而足下聞之欣然以書為貺松茂
柏悅情雖後凋玉振金相詞多溢美且徵縉雲贈行之
什頗有姑尤善祝之言雖然戲謔若合符契竊以古之
交道嘗聞之矣蓋以聞善相告爵祿相先急病讓夷謀
事補闕以引以翼或推或挽故蕭何舉代曹參趙裝以

請行王陽登用貢禹彈冠而願仕伐木求友頌聲載揚
遠方得朋名教為樂益以見足下之意當僕之領郡也
必欲發揮虛名稔熟輿聽故羣公供帳發而成詩及僕
之竊寵也又欲銷弭浮謗充塞前言故千里附書明微
其事使鄙夫無暴得之媿聖朝免虛授之譏仁者用心
其利博矣足以明殺雞炊黍范張區區於小信縞帶紵
衣僑札拳拳于微物以今況古夫何隘哉邊塵不驚戎
聞自肅干木高臥足以作藩夷甫清談未妨為政唯節

宣吐納順時加愛副九重推轂之寄成萬里封侯之業
斯悽悽之誠所望于明哲也某頓首

荅錢易書

某白辱示戒殺生文披繹數四不能釋手非宿殖德本
深達實相于十方佛種諸善根處五濁世遠離黑業信
力堅固心華發明其孰能形於文詞垂于勸戒如是之
勤切懇至也某不佞竊從事于空宗為日雖淺聞道素
篤常服首楞之典獲佩法王之訓乃知世間輪迴殺貪

為本胎化濕卵強弱相吞生死循環互相啖食始由一念之迷惑遂致萬化之紛綸相變體殊識均形異而乃取其血肉以滋牙齒鬻割炮燔剝剔剗斲是使人羊迭變各自報讎火刀殊塗並淪苦趣我佛所以為一事因緣而出世設十二分教以化人誘掖羣迷首舉茲事乃著五戒以殺戒而為先乃標三毒本貪毒之所攝故玉毫光明而顯相金口鄭重以形言深念含靈直指正路以為食肉而証法果實墮邪魔好殺而出塵勞無有是

處借如智慧自足禪定現前不過為大力鬼神夜叉羅刹一報既畢衆苦所叢墮無間阿鼻厯僧祇大劫是以比丘結夏恐踐微蟲菩薩在塗不蹋生草此世尊之清淨明誨衆生之寃債本源奉之周旋豈可失墜乃至無麁無卵小正之遺文飲水飯蔬宣尼之素志春秋所記肉食未能遠謀易象之言殺牛不如禴祭殮必方丈史策罪其奢豪庭有懸犴詩人譏其尸素咸有明訓載於青編且夫仁人之心常善以救物就死地而骸骸豈

忍于牛羊粟生氣以肖翹必愛乎螻蟻而乃屠于刀鋸
之際充乎杯俎之間競水陸之珍羞奉口腹之嗜好至
有南朝牧守所居而飛走輒殫西晉宰衡一日而金錢
盈萬蓋厚於味而薄于行夷吾之劇談嗜欲深而天機
淺漆園之高論豈可忽因果報應之說逐醉飽睡眠之
徒何以為大丈夫何以為法王子故足下因几筵號慕
之隙禪祥吉祭之辰念劬勞之恩終天莫報顧追薦之
福惟佛是依對香火以危誠託文字以宣意八部龍天

而侍衛一切聖賢以護持奮筆不停移晷而就金聲玉振霞駁雲披淨名談空蓋助如來而行化摩耶証果爰詣兜率以往生此又豈與刻木丁蘭瞻形墮泣園基阮籍嘔血自殘但能取於毀傷莫有資於解脫同日而語寧易得哉且奉示言欲刊方板俾傳布遠邇激勵昏蒙此所謂分一燈為百千燈發一言而千里應之者也讚歎踊躍不知所裁聊述所聞用以為謝不宣

答陳在中書

某白辱所著蒙言釋象六篇披繹之際初不能曉既而考釋卦之由臆取象之自有條不紊乃端若貫珠自難而易亦漸如攻木頗以見作者之旨也豈不以山泉之象著於大易以險而止蓋取諸蒙二象並設所以建六爻之位六爻肇分所以明一卦之意初六混沌未判目之為混源九二剛中得位于焉而照物六三有求明之義六四得養正之理六五陰默上九文明推而廣之區以別矣且自三五以降訖于周政教之汗隆討禦之得

失創守之方略治亂之本原莫不周旋紬繹包括總統
引而伸之如繭之抽緒提而舉之若網之在綱窮理盡
性鉤深索隱磊磊落落自成一家之言矣昔京房作易
占焦贛作易林歷代宗之然不過卜筮之說子雲述太
玄建立方州部家雖云準易其如參以星歷頗近術數
若今之所作但取一卦之意磅礴數千載之間撫其成
敗是非可為著蔡者著于篇傑然名家貽于後覺蓋與
夫先民之用心不同矣方將獻于公車升聞于天充衡

石之餘備乙夜之覽夏侯勝有云士患經不明經苟明其取朱紫如拾地芥耳君之是舉豈僕所能識哉其本輒留庶用探究聊述所聞豈足多謝


發願文上舍人沙門願安

弟子某申謹沐首齋心信曰十方常住一切諸佛真淨妙法無生聖人惟願以真實眼真實智真實平等不捨誓願洞賜哀憐切念某與法界衆生從無始曠大劫來未識佛時未遇法時未曾僧時于其中間至于今日

趨塵背覺迷失本心閉解脫門涉輪迴道蝟張見網蜂
喧妄塵懸嗜慾之帆鼓無明之浪杯我慢酒醉苦惱鄉
不凭歸向之誠是滯果因之迹如斯過咎齊佛所知唯
佛所見若輕若重等與法界衆生有茲罪者同共懺悔
願罪銷滅願罪銷滅以某甲所集凡有善根隨時迴向願與法界
衆生迴向真如實際菩提實際衆生及微塵刹海諸佛
土中承諸佛本誓願力大威猛力勝護念力盡未來際
直至無上菩提為一切依正莊嚴具為一切自他解脫

門一切三昧門一切陀羅尼門一切安立衆生門一一稱虛空等法界皆有我身起勇猛心捨身命財興大佛事作大利益攝化有情願諸有情見我身聞我名皆發菩提心與我同共迴向無上菩提心不退轉願某與法界衆生未契心者開佛知見悟本自心一念發明諸境純淨去來坐立見覺聞知咸以如實智相應不相違背從今已去盡未來際憶菩提心令菩提心相續不斷所作利益常得現前供養諸佛利樂衆生衆生成佛盡然

後成正覺虛空有盡我願無窮法界有邊願心無極盡
入行願海中一時成佛摩訶般若波羅密



武夷新集卷十八